

সপ্তম শ্রেণি • বাংলাদেশ ও বিশ্বপরিচয় • অধ্যয়নভিত্তিক সৃজনশীল প্রশ্নের উত্তর

অধ্যায়—৩: পরিবারে শিশুর বেড়ে ওঠা

সৃজনশীল—১ ■ নিচের উদ্দীপকটি পড় এবং প্রশ্নগুলোর উত্তর দাও:

মেহরিমা ও জেরিন দুই বান্ধবী। জেরিনদের বাসায় তার একটি ছোট ভাই থাকে। মেহরিমাদের বাসায় জেরিন বেড়াতে গিয়ে দেখতে পায় যে একটি বড় ডাইনিং টেবিলে চাচা-চাচি, দাদা-দাদিসহ অনেকে খাচ্ছে এবং খাওয়া শেষে জেরিন মেহরিমাসহ দাদির গল্প শুনতে শুনতে ঘুমিয়ে পড়ল। জেরিনের খুব ভালো লাগল।

- ক. সামাজিকীকরণ কী?
খ. শিশুর ভাষা শিক্ষার প্রথম মাধ্যম ‘মা’-ব্যাখ্যা কর।
গ. জেরিনদের পরিবার কোন ধরনের পরিবার? ব্যাখ্যা কর।
ঘ. “সামাজিকীকরণের ক্ষেত্রে অধরাদের পরিবারের ভূমিকা বেশি—এ বক্তব্যের সাথে তুমি কি একমত? তোমার মতামত দাও।

১ নম্বর সৃজনশীল প্রশ্নের উত্তর

- ক. শিশু যেভাবে সামাজিক হয়ে গড়ে ওঠে তাকে সামাজিকীকরণ বলে।
খ. শিশুর সামাজিকীকরণের প্রথম সূত্রপাত ঘটে মার কাছ থেকে। যেমন : শিশুর ভাষা শিক্ষার প্রথম মাধ্যম ‘মা’। এছাড়াও শিশুর খাদ্যাভ্যাস ও আচরণেও মার প্রভাব লক্ষ করা যায়। মা-ই শিশুকে প্রথম ঘুম পাড়ায়। পরবর্তীতে বর্ণ শিক্ষা, শব্দ শিক্ষা, ছড়া শিক্ষা সবকিছু মা-ই দিয়ে থাকেন।
গ. জেরিনদের পরিবার একটি একক পরিবার।
পরিবার একটি স্থায়ী সামাজিক সংগঠন। সকল সমাজেই পরিবার রয়েছে। সব পরিবারের ধরন একরকম নয়। বৈশিষ্ট্যের দিক থেকেও পরিবারের ধরন ভিন্ন। যেমন : স্বামী-স্ত্রী ও অধিবাহিত সন্তান নিয়ে একক পরিবার গঠিত হয়। আবার সন্তান উপযুক্ত হলে বিয়ে করে আলাদা পরিবার গঠন করে। তখন আরেকটি নতুন একক পরিবার গঠিত হয়। বাংলাদেশের শহরাঞ্চলে একক পরিবারের সংখ্যা অনেক বেশি। তদ্রূপ উদ্দীপকের জেরিন তার বাবা-মা ও ছোট ভাইকে নিয়ে একটি পরিবারে বাস করে। এটা একক পরিবারেরই বৈশিষ্ট্য। অতএব, সুনিশ্চিতভাবেই বলা যায়, জেরিনদের পরিবারের সাথে পাঠ্যবইয়ের একক পরিবার সম্পূর্ণ সাদৃশ্যপূর্ণ।
ঘ. হ্যাঁ, সামাজিকীকরণের ক্ষেত্রে অধরাদের পরিবারের ভূমিকা বেশি। উদ্দীপকের এ বক্তব্যের সাথে আমি সম্পূর্ণ একমত। রক্তের সম্পর্কের ভিত্তিতে কয়েকটি একক পরিবার মিলে যৌথ পরিবার গঠিত হয়। যৌথ পরিবারে মা-বাবা, ভাই, বোন, চাচা-চাচি, দাদা-দাদি সবাই একত্রে বাস করে। যৌথ পরিবারের সকল সদস্যদের বন্ধুত্বপূর্ণ আচরণের মাধ্যমে শিশুর সামাজিকীকরণের ব্যাপক বিকাশ ঘটে। তেমনি উদ্দীপকেও দেখা যায়, অধরাদের বাড়িতে তারা চাচা-চাচি, দাদা-দাদি, মা-বাবা সবাই একসাথে বাস করে। দাদির কাছ থেকে সে নানাদরনের গল্পও শোনে। যা তার সামাজিকীকরণে অনেক ভূমিকা রাখে। শুধু অধরার ক্ষেত্রেই নয় যৌথ পরিবারের সকল সদস্যদের সাথে শিশুর পারস্পরিক আচার-আচারণিক সম্পর্ক গড়ে উঠে। এ সম্পর্কের মধ্য দিয়ে শিশু সহযোগিতা, সহিষ্ণুতা, সহমর্মিতা বিভিন্ন গুণ অর্জন করার সামাজিক শিক্ষা পায়। যা শিশুর সামাজিকীকরণে গুরুত্বপূর্ণ প্রভাব ফেলে। পরিশেষে বলা যায় যে, সামাজিকীকরণের ক্ষেত্রে যৌথ পরিবারের ভূমিকা অনেক বেশি। উক্তিটি যথার্থই সত্য।

সৃজনশীল—২ ■ নিচের উদ্দীপকটি পড় এবং প্রশ্নগুলোর উত্তর দাও:

রত্না ও রূপা চাচাতো বোন। একই বাড়িতে তারা দাদা-দাদিসহ বসবাস করতো। তাদের মধ্যে খুবই বন্ধুত্ব। রত্নার বাবা চাকরি নিয়ে অন্যত্র বদলি হলে রত্না মা-বাবার সাথে চলে গেলো। রূপা দাদা-দাদীসহ অন্যদের সাথে বসবাস করতে লাগলো। অনেকদিন পর রত্না ও রূপার দেখা হলে তারা আগের মত মিশতে পারে না। রূপা মিশতে গেলেও রত্না এড়িয়ে চলতে চায়। রূপা সবার সাথে মিলেমিশে থাকতে চায়। সবাইকে সহযোগিতা করতে চায়। এজন্য সবাই রূপাকে খুব পছন্দ করে।

- ক. সাধারণত শিশুরা ধর্মীয় শিক্ষা কোথায় পায়?
খ. পরিবার চিরস্থায়ী সামাজিক সংগঠন—ব্যাখ্যা কর।
গ. রত্নার এরূপ আচরণের কারণ ব্যাখ্যা কর।
ঘ. “রূপার আচরণে যৌথ পরিবারের আবদান সর্বাধিক”—তুমি কি একমত? উত্তরের স্বপক্ষে যুক্তি দাও।

২ নম্বর সৃজনশীল প্রশ্নের উত্তর

- ক. সাধারণত শিশুরা ধর্মীয় শিক্ষা পরিবার থেকে পায়।

- খ. পরিবার থেকে মানবজাতি বিকাশ লাভ করেছে এবং তার সাথে সমাজেরও অগ্রগতি সাধিত হয়েছে। একই সঙ্গে বসবাসকারী কয়েকজন ব্যক্তির সমষ্টিকে পরিবার বলে। যা বিয়ে, আত্মীয়তা অথবা পিতা-মাতার সূত্রের বন্ধনে আবদ্ধ একটি সামাজিক প্রতিষ্ঠান। তাই বলা যায়, পরিবার একটি চিরস্থায়ী সামাজিক সংগঠন।
- গ. উদ্দীপকের রত্না বন্ধুদেরকে এড়িয়ে চলতে চায়। এর পেছনে নানাধরনের কারণ বিদ্যমান। একজন শিশু পরিবার থেকে বন্ধুত্ব, ভ্রাতৃত্ববোধ প্রভৃতি শিক্ষা গ্রহণ করে। বাংলাদেশের শহরের যেসব পিতা-মাতা উভয়ই চাকুরিজীবী, সেসব পরিবারে শিশুকে গৃহভূত্যের বা আত্মীয় স্বজনের ওপর নির্ভরশীল হতে হয়। এসব পরিবারের পিতা-মাতা শিশুদেরকে সময় দিতে পারে না। ফলে শিশুর সামাজিকীকরণের বিকাশ ঘটে না। এছাড়াও পারিবারিক বিশৃঙ্খলা, পিতা-মাতার বিচ্ছেদ, ভিন্ন গৃহে বসবাস, উভয়ের মৃত্যু প্রভৃতি শিশুর সুষ্ঠু সামাজিকীকরণে বাধার সৃষ্টি করে। ফলে শিশুর আচরণে একাকীত্ববোধ, প্রতিহিংসা, পলায়ন মনোভাব, আত্মকেন্দ্রিক মনোভাব প্রভৃতি দেখা দেয়। এসবই সামাজিকীকরণে সুষ্ঠু পরিবেশের অভাবে হয়ে থাকে। তদ্রূপ উদ্দীপকেও দেখা যায়, রত্নার বাবা-মা চাকুরিজীবী হওয়ায় রত্নার মধ্যে ব্যাপক একাকীত্ব সৃষ্টি হয়েছে যার কারণে যে বন্ধুদের সাথে মিশতে পারে না। এমনকি তাদেরকে এড়িয়েও চলে। অতএব বলা যায় যে, উদ্দীপকের রত্না সুষ্ঠু সামাজিকীকরণের অভাবে এমন বন্ধুত্বহীন আচরণ করে।
- ঘ. হ্যাঁ, রূপার আচরণে যৌথ পরিবারের অবদান সর্বাধিক। আমি এ বক্তব্যের সাথে সম্পূর্ণ একমত। যৌথ পরিবারে দাদা-দাদি, চাচা-চাচিসহ অন্যান্য সদস্যদের সাথে শিশুর পারস্পরিক সম্পর্ক গড়ে ওঠে। এ ধরনের সম্পর্কের মাধ্যমে শিশু পারস্পরিক সহযোগিতা, সহিষ্ণুতা, সহমর্মিতা, সহনশীলতা, নিরাপত্তাবোধ, সমানভাগের অংশীদারসহ বিভিন্ন গুণ অর্জন করার শিক্ষা পায়। যা শিশুর সামাজিকীকরণে ব্যাপক প্রভাব ফেলে। মূলত পরিবার শিশুর সামাজিকীকরণের একটি গুরুত্বপূর্ণ মাধ্যম। শিশুর জীবনের ভালো ও খারাপ অভ্যাস এসবই পরিবারেরই ফল। তদ্রূপ উদ্দীপকের রূপার মধ্যে বন্ধুত্বপূর্ণ আচরণ লক্ষ করা যায়। কারণ সে তার বাবা-মা, দাদা-দাদিসহ একই পরিবারে বসবাস করে। এতে রূপার ভিতরে পরিবারের সদস্যদের ভালো আচরণগুলো ব্যাপকভাবে প্রভাব বিস্তার করে। এছাড়াও যৌথ পরিবারের মধ্যে বসবাস করলে শিশুর মধ্যে সামাজিক নীতিবোধ, নাগরিক চেতনাবোধ, ভ্রাতৃত্ববোধ ও ভালোবাসা জন্মে। পরিশেষে বলা যায় যে, উদ্দীপকের রূপার এরূপ বন্ধুত্বপূর্ণ আচরণে যৌথ পরিবারের অবদান যে সর্বাধিক তা অনস্বীকার্য।

সৃজনশীল—৩ ■ নিচের উদ্দীপকটি পড় এবং প্রশ্নগুলোর উত্তর দাও:

চার মাসের ছোট নীলাদ্রিকে দাদু কোলে নিয়ে আদর করে বলেন, এ হচ্ছে চিরস্থায়ী সামাজিক সংগঠনের গুরুত্বপূর্ণ সদস্য। এ ধরনের সংগঠন থেকে মানবজাতি বিকাশ লাভ করেছে এবং সাথে সাথে সমাজের কাক্ষিত অগ্রগতি সাধিত হয়েছে।

- ক. শহুরে পরিবারের প্রধান রূপ কী?
- খ. পরিবর্তনশীল পরিবার বলতে কী বোঝায়?
- গ. উদ্দীপকে কোন সামাজিক সংগঠন নির্দেশিত হয়েছে? ব্যাখ্যা কর।
- ঘ. উক্ত সংগঠনের ধরণসমূহ পাঠ্যপুস্তকের আলোকে বিশ্লেষণ কর।

৩ নম্বর সৃজনশীল প্রশ্নের উত্তর

- ক. শহুরে পরিবারের প্রধান রূপ হচ্ছে ক্ষুদ্র পরিবার।
- খ. পরিবর্তনশীল পরিবার বলতে মূলত ধরন পরিবর্তন হয়ে যে পরিবারের সৃষ্টি হয় সে পরিবারকে বোঝায়। যেমন : গ্রামীণ যৌথ পরিবার ভেঙে একক পরিবারের সৃষ্টি হয়। অধিক জনসংখ্যা, পারিবারিক দ্বন্দ্ব, বিবাহ বিচ্ছেদ, নারীর কর্মসংস্থান প্রভৃতি কারণে পরিবারের এ ধরনের পরিবর্তন সূচীত হয়।
- গ. উদ্দীপকে সামাজিক সংগঠন পরিবার সম্পর্কে নির্দেশিত হয়েছে। একই সঙ্গে বসবাসকারী কয়েকজন ব্যক্তির সমষ্টিকে পরিবার বলে। এটি বিয়ে, আত্মীয়তা অথবা পিতামাতার সূত্রের বন্ধনে আবদ্ধ একটি সামাজিক প্রতিষ্ঠান। এর সদস্যদের মধ্যে থাকে গভীর সম্পর্ক। যার মূলে রয়েছে স্নেহ, মায়া-মমতা এবং আবেগীয় সম্পর্ক। সমাজের প্রাথমিক প্রতিষ্ঠান হিসেবে পরিবার নানারকম দায়িত্ব পালন করে থাকে। এদের মধ্যে বংশরক্ষা ও সামাজিকীকরণ অন্যতম। আবার সৃষ্টির শুরু থেকে আজপর্যন্ত পরিবারের ধরনে ও ভিন্নতা লক্ষ্য করা যায়। তাছাড়া পরিবার হচ্ছে শিশু বেড়ে ওঠার প্রথম সূতিকাগার। এর মাধ্যমেই শিশুর সামাজিকীকরণ শুরু হয়। আদিম সমাজে পরিবার ব্যবস্থা যেমন ছিল বর্তমানে তেমনটি নেই। নানা বিবর্তনের মধ্য দিয়ে পরিবার আধুনিক রূপ লাভ করেছে; যার প্রতিচ্ছবি উদ্দীপকে তুলে ধরা হয়েছে। সুতরাং বলা যায় যে, উদ্দীপকে চিরস্থায়ী সামাজিক সংগঠন পরিবারের কথা বলা হয়েছে।
- ঘ. উক্ত সংগঠন অর্থাৎ পরিবারের দুটি ধরন রয়েছে। যথা : একক পরিবার ও যৌথ পরিবার। স্বামী-স্ত্রী ও অবিবাহিত সন্তান নিয়ে একক পরিবার গঠিত হয়। সন্তান উপযুক্ত হলে বিয়ে করে আলাদা পরিবার গঠন করে। তখন আরেকটি নতুন একক পরিবার হয়। একক পরিবারে স্বামীর মতামতকে প্রাধান্য দেওয়া হয়। তবে স্ত্রীর মতামত উপেক্ষিত নয়। বাংলাদেশের শহরাঞ্চলে একক

পরিবারের সংখ্যা অনেক বেশি। অন্যদিকে রক্তের সম্পর্কের ভিত্তিতে কয়েকটি একক পরিবার মিলে যৌথ পরিবার গঠিত হয়। সাধারণত কোনো পরিবারের কর্তার সাথে যদি তার বাবা-মা এবং এক বা একাধিক ভাই, বোন ও তাদের সন্তান সন্ততি বা দাদা-দাদি, চাচা-ফুফু একত্রে বসবাস করে তাকে যৌথ পরিবার বলে। বাংলাদেশ ও ভারতের গ্রামাঞ্চলে যৌথ পরিবার দেখা যায়। তবে সম্প্রতি আর্থিক পরিবর্তন, পেশাগত পরিবর্তন এবং সম্পত্তির সিলিং নীতি ইত্যাদি কারণে বাংলাদেশের গ্রামীণ সমাজে যৌথ পরিবারে ভাঙন দেখা দিয়েছে। বাংলাদেশের গ্রামীণ সমাজে পরিবারের ক্ষমতা পিতার হাতেই বেশি লক্ষ করা যায়।

সৃজনশীল—৪ ■ নিচের উদ্দীপকটি পড় এবং প্রশ্নগুলোর উত্তর দাও:

জনাব ‘ক’ গ্রামে বসবাস করেন। কৃষিকাজ করেই তিনি জীবিকা নির্বাহ করেন। পরিবারের নেতৃত্ব কেবল তার হাতেই ন্যস্ত। অন্যদিকে তার বন্ধু জনাব ‘খ’ শহরে বসবাস করেন। পরিবারে সিদ্ধান্ত গ্রহণের ক্ষেত্রে জনাব ‘খ’ তার স্ত্রীর মতামতকে যথেষ্ট গুরুত্ব দিয়ে থাকেন।

- ক. পরিবার কাকে বলে?
- খ. একক পরিবার বলতে কী বোঝায়?
- গ. জনাব ‘খ’ এর পরিবার কোন ধরনের পরিবারের ইঙ্গিত বহন? ব্যাখ্যা কর।
- ঘ. জনাব ‘ক’ ও জনাব ‘খ’ এর পরিবারের তুলনামূলক আলোচনা কর

৪ নম্বর সৃজনশীল প্রশ্নের উত্তর

- ক. একই সঙ্গে বসবাসকারী কয়েকজন ব্যক্তির সমষ্টিকে পরিবার বলে।
- খ. স্বামী-স্ত্রী ও অবিবাহিত সন্তান নিয়ে গঠিত পরিবারকে একক পরিবার বলে। সন্তান উপযুক্ত হলে বিয়ে করে আলাদা পরিবার গঠন করে। তখন আরেকটি নতুন একক পরিবার হয়। বাংলাদেশের শহরাঞ্চলে একক পরিবারের প্রাধান্য বেশি। এছাড়া বর্তমান বিশ্বেও একক পরিবারের গ্রহণযোগ্যতাই সর্বাধিক।
- গ. জনাব ‘খ’ এর পরিবার শহুরে পরিবারের ইঙ্গিত বহন করে। সীমিত আয় এবং বাসস্থান সমস্যার কারণে গড়ে উঠা ক্ষুদ্র পরিবারই হচ্ছে শহুরে পরিবারের প্রধান রূপ। এ ধরনের পরিবারগুলো সাধারণত স্বামী-স্ত্রী ও অবিবাহিত সন্তান নিয়ে গড়ে উঠে। সহজ, সরল ও সাবলীল জীবনযাপন এ ধরনের পরিবারের অন্যতম বৈশিষ্ট্য। এ ধরনের পরিবারগুলোতে সাধারণত স্বামী-স্ত্রী উভয়েই শিক্ষিত হয়। শহরের এ শিক্ষিত মধ্যবিত্ত ও উচ্চবিত্ত পরিবারের নেতৃত্ব কেবল স্বামীর হাতেই ন্যস্ত থাকেন। একে অপরের প্রতি শ্রদ্ধাবোধ পোষণ করে। তারা একে অন্যের মতামতকে গুরুত্ব দিয়ে থাকে। পরিবারের যেকোন বিষয়ে তারা একে অপরের সাথে মত বিনিময় করে সিদ্ধান্ত নিয়ে থাকে। তেমনি উদ্দীপকেও দেখা যায় জনাব ‘খ’ পরিবারের যেকোন সিদ্ধান্ত গ্রহণের ক্ষেত্রে তার স্ত্রীর মতামতকে যথেষ্ট গুরুত্ব দেন। সুতরাং বলা যায়, জনাব ‘খ’ এর পরিবারটি শহুরে পরিবারকে নির্দেশ করছে।
- ঘ. জনাব ‘ক’ এর পরিবার গ্রামীণ পরিবার। অন্যদিকে জনাব ‘খ’ এর পরিবার শহুরে পরিবার। গ্রামীণ পরিবার ও শহুরে পরিবারের মধ্যে ব্যাপক পার্থক্য রয়েছে। গ্রামীণ পরিবারগুলো সাধারণত যৌথ পরিবার। এ ধরনের পরিবারের বেশিরভাগই কৃষি কাজ করে জীবিকা নির্বাহ করে। তাই উত্তরাধিকার সূত্রে প্রাপ্য জমি প্রথমে দাদা তার পর বাবা পরে ছেলে এইভাবে ক্রমে পরিবার বড় হতে থাকে। অন্যদিকে শহুরে পরিবারগুলো একক পরিবার। এখানে বিভিন্ন শ্রেণি ও পেশার মানুষ বসবাস করে। বর্তমানে গ্রামে আর্থিক পরিবর্তন, পেশাগত পরিবর্তন, সম্পত্তির সিলিং নীতি ইত্যাদি কারণে যৌথ পরিবারে ভাঙন দেখা দিয়েছে। অন্যদিকে সীমিত আয় এবং বাসস্থান সমস্যার কারণে ক্ষুদ্র পরিবারই হচ্ছে শহুরে পরিবারের প্রধান রূপ। এছাড়াও শহুরে পরিবারে সিদ্ধান্ত গ্রহণের ক্ষেত্রে স্বামী-স্ত্রীর উভয়ের মতামতকেই গুরুত্ব প্রদান করা হয়। সুতরাং দেখা যাচ্ছে, জনাব ‘ক’ ও জনাব ‘খ’ এর পরিবারের মধ্যে বিস্তার পার্থক্য বিদ্যমান।

সৃজনশীল—৫ ■ নিচের উদ্দীপকটি পড় এবং প্রশ্নগুলোর উত্তর দাও:

জনাব আসাদের পরিবারে স্ত্রী সন্তান ছাড়াও রয়েছে তার মা-বাবা, ভাইবোন। প্রত্যেক মাসে পরিবারের ভরণপোষণ চালাতে তাকে বেশ বেগ পেতে হয়। অন্যদিকে, জনাব সরওয়ার চাকরি পেয়ে গ্রাম ছেড়ে শহরে গিয়ে একমাত্র সন্তান ও স্ত্রীকে নিয়ে বসবাস করছে।

- ক. পরিবারের অন্যতম দায়িত্ব কী?
- খ. গ্রামীণ ও শহুরে পরিবারের মধ্যে পার্থক্য লেখ।
- গ. উদ্দীপকে জনাব আসাদের পরিবারের ধরন বর্ণনা কর।
- ঘ. “সরওয়ার সাহেবের পরিবারটি পরিবারের ক্ষুদ্র ও সর্বাধুনিক রূপ”— উক্তিটির যথার্থতা বিশ্লেষণ কর।

৫ নম্বর সৃজনশীল প্রশ্নের উত্তর

- ক. পরিবারের অন্যতম দায়িত্ব হলো বংশরক্ষা ও সামাজিকীকরণ।

- খ. গ্রামীণ পরিবারগুলো হলো অধিকাংশই যৌথ পরিবার। অন্যদিকে শহরের বেশিরভাগ পরিবার হলো একক পরিবার। গ্রামীণ পরিবারগুলোতে বংশমর্যাদা ভিত্তিতে সামাজিক মর্যাদা নির্ধারিত হয়। অন্যদিকে শহরের পরিবারগুলোতে পেশার ভিত্তিতে সামাজিক মর্যাদা নির্ধারিত হয়।
- গ. জনাব আসাদের পরিবার হলো যৌথ পরিবার। বস্তুত কোনো পরিবারের কর্তার সাথে যদি তার বাবা-মা এবং এক বা একাধিক ভাই, বোন ও তাদের সন্তান সন্ততি বা দাদা-দাদি, চাচা-ফুফু একত্রে বসবাস করে তাকে যৌথ পরিবার বলে। এ ধরনের পরিবার রক্তের সম্পর্কের ভিত্তিতে গড়ে উঠে। অর্থাৎ রক্তের সম্পর্কের ভিত্তিতে কয়েকটি একক পরিবার মিলে যৌথ পরিবার গঠিত হয়। বাংলাদেশ ও ভারতের গ্রামাঞ্চলে এ ধরনের পরিবার দেখা যায়। উদ্দীপকে জনাব আসাদ স্ত্রী সন্তান, মা-বাবা ও ভাইবোন নিয়ে বসবাস করে বলেই তার পরিবারটি একটি যৌথ পরিবার হিসেবে বিবেচিত হয়। এ ধরনের পরিবারে বয়োজৈষ্ঠদেরকেই পরিবারের কর্তা হিসেবে গণ্য করা হয়। এছাড়াও যৌথ পরিবারকে পরিবারের অর্থনৈতিক একক বলা হয়। অতএব উদ্দীপকে জনাব আসাদের পরিবারটি পাঠ্যবইয়ের যৌথ পরিবারেরই সাদৃশ্য বহন করে।
- ঘ. উদ্দীপকে জনাব সরওয়ারের পরিবারটি একক পরিবার। পরিবারের ক্ষুদ্র ও সর্বাধুনিক রূপ হচ্ছে একক পরিবার। এ ধরনের পরিবারে স্বামী স্ত্রী এবং তাদের ছোটছোট ছেলেমেয়ে থাকে। কারোও কারোও মতে একক পরিবার বলতে বোঝায় শুধু স্বামী স্ত্রী নিয়ে গঠিত পরিবার। সহজ, সরল ও সাবলীল জীবন পদ্ধতি এ ধরনের পরিবারের অন্যতম বৈশিষ্ট্য। শিল্পোন্নত এবং আত্মকেন্দ্রিক সমাজে এ ধরনের পরিবারের প্রচলন অনেক বেশি। এছাড়া পাশ্চাত্য সমাজে এ ধরনের পরিবার বেশ জনপ্রিয়। এ ধরনের পরিবারের সন্তানরা উপযুক্ত হলে বিয়ে করে আলাদা পরিবার গঠন করে। তখন আরেকটি নতুন একক পরিবার হয়। একক পরিবারের নেতৃত্ব কেবল স্বামীর হাতেই ন্যস্ত থাকে না। এ ধরনের পরিবারে সিদ্ধান্ত গ্রহণের ক্ষেত্রে স্ত্রীর মতামতকে যথেষ্ট গুরুত্ব দেওয়া হয়। বাংলাদেশের শহরাঞ্চলে এ ধরনের পরিবারের সংখ্যা বেশি। পরিশেষে বলা যায় যে, সরওয়ার সাহেবের পরিবারটি বর্তমানে পরিবারের ক্ষুদ্র ও সর্বাধুনিক এবং পরিমার্জিত সংস্করণ।

সৃজনশীল—৬ ■ নিচের উদ্দীপকটি পড় এবং প্রশ্নগুলোর উত্তর দাও:

জনাব ‘ক’ একজন ব্যবসায়ী। তিনি স্ত্রী সন্তান, মা-বাবা ও ভাইবোন নিয়ে বসবাস করেন। তার পরিবারের সদস্য সংখ্যা বারজন। পরিবারের ভরণপোষণের পর তিনি তার সন্তানদের লেখাপড়া খরচ চালাতে পারেন না। প্রত্যেক মাসেই তিনি অর্থ কষ্টে ভোগেন।

- ক. শিশুর বেড়ে ওঠার প্রথম সূতিকাগার কী?
- খ. “সমাজ জীবন সামাজিকীকরণের একটি গুরুত্বপূর্ণ উপাদান।”—ব্যাখ্যা কর।
- গ. জনাব ‘ক’ এর পরিবারের সাথে পাঠ্যবইয়ের কোন ধরনের সাদৃশ্য রয়েছে? ব্যাখ্যা কর।
- ঘ. উক্ত পরিবার দিন দিন বিলুপ্ত হয়ে যাচ্ছে—উক্তিটি মূল্যায়ন কর।

৬ নম্বর সৃজনশীল প্রশ্নের উত্তর

- ক. শিশুর বেড়ে ওঠার প্রথম সূতিকাগার হলো পরিবার।
- খ. সমাজ জীবন সামাজিকীকরণের একটি গুরুত্বপূর্ণ উপাদান। মানুষের সমাজ জীবন মূলত কতগুলো আচার-আচরণ দ্বারা নিয়ন্ত্রিত। মানুষ যে সমাজে বসবাস করে, সে সমাজের জীবনধারা অর্থাৎ আচার-আচরণের সমষ্টিই হলো সমাজ জীবন। মানুষ সমাজের নানা কর্মকাণ্ড ও অনুষ্ঠানে অংশগ্রহণ করে। এসব কর্মকাণ্ড ও অনুষ্ঠান সংশ্লিষ্ট আচরণের সাথে মানুষ ক্রিয়া-প্রতিক্রিয়া করে খাপ খাওয়ানোর চেষ্টা করে।
- গ. জনাব ‘ক’ এর পরিবারের সাথে যৌথ পরিবারের সাদৃশ্য রয়েছে সাধারণত কোনো পরিবারের কর্তার সাথে যদি তার বাবা-মা এবং এক বা একাধিক ভাই, বোন ও তাদের সন্তান সন্ততি বা দাদা-দাদি, চাচা-ফুফু একত্রে বসবাস করে তাকে যৌথ পরিবার বলে। যৌথ পরিবার বিবাহিত পুত্র ও তার সন্তানাদিসহ পিতা-মাতার কর্তৃত্বাধীনে এক সংসারে বাস করে। এ ধরনের পরিবার রক্তের সম্পর্কের ভিত্তিতে গড়ে উঠে। অর্থাৎ রক্তের সম্পর্কের ভিত্তিতে কয়েকটি একক পরিবার মিলে যৌথ পরিবার গঠিত হয়। উদ্দীপকে দেখা যায়, জনাব ‘ক’ তার স্ত্রী সন্তান, মা-বাবা ও ভাইবোন নিয়ে একত্রে বসবাস করেন। তার পরিবারের মোট সদস্য সংখ্যা বারজন; যা যৌথ পরিবারকেই নির্দেশ করছে।
- ঘ. হ্যাঁ, আমি মনে করি উক্ত ধরনের পরিবার অর্থাৎ যৌথ পরিবার দিন দিন বিলুপ্ত হয়ে যাচ্ছে। শিল্পায়ন, নগরায়ন, জনসংখ্যা বৃদ্ধি, জীবনযাত্রার ব্যয় বৃদ্ধি প্রভৃতি যৌথ পরিবার বিলুপ্ত হওয়ার পেছনে মুখ্য ভূমিকা পালন করছে। আমাদের দেশে গ্রামীণ সমাজে যৌথ পরিবারই বেশি দেখা যায়। কেননা গ্রামীণ সমাজে বেশিরভাগ পরিবারই কৃষি কাজ করে জীবিকা নির্বাহ করে। তাই উত্তরাধিকারসূত্রে প্রাপ্য জমি প্রথমে দাদা তার পর বাবা পরে ছেলে ক্রমান্বয়ে চাষাবাদ করে। এইভাবে ক্রমে পরিবার বড় হতে থাকে। সাধারণভাবে গ্রামের পরিবারগুলো এক সময় যৌথ ধরনের ছিল। কিন্তু বর্তমানে আর্থিক পরিবর্তন, পেশাগত পরিবর্তন এবং সম্পত্তির সিলিং নীতি ইত্যাদি কারণে যৌথ পরিবারে ভাঙন দেখা দিয়েছে। আর এ প্রেক্ষিতে আমি মনে করি যৌথ পরিবার দিন দিন বিলুপ্ত হয়ে যাচ্ছে।

সৃজনশীল—৭ ■ নিচের উদ্দীপকটি পড় এবং প্রশ্নগুলোর উত্তর দাও:

মিশ্র ও নাহার দুজন দুজনকে ভালোবাসে। সম্প্রতি তারা সমাজ স্বীকৃত নির্দিষ্ট কিছু আনুষ্ঠানিকতার মধ্য দিয়ে একটি চিরস্থায়ী সামাজিক সংগঠনের সদস্য হয়। নানা বিবর্তনের মধ্য দিয়ে সংগঠনটি বর্তমান অবস্থায় এসে উপনীত হয়েছে। সংগঠনটির উৎপত্তি যেভাবেই হোক না কেন এটি মানব সমাজের সবচেয়ে গুরুত্বপূর্ণ সামাজিক প্রতিষ্ঠান।

- ক. সমাজের ক্ষুদ্র একক কী?
খ. যৌথ পরিবার বলতে কী বোঝায়?
গ. উদ্দীপকে কোন সামাজিক সংগঠনের ইঙ্গিত রয়েছে? ব্যাখ্যা কর।
ঘ. ‘উক্ত সংগঠনটির শিক্ষা বিষয়ক ভূমিকা আগের মতো নেই’—যুক্তিপূর্ণ মতামত দাও।

৭ নম্বর সৃজনশীল প্রশ্নের উত্তর

- ক. সমাজের ক্ষুদ্র একক হলো পরিবার।
খ. কোনো পরিবারের কর্তার সাথে যদি তার বাবা-মা এবং এক বা একাধিক ভাই, বোন ও তাদের সন্তান সন্ততি দাদা-দাদি, চাচা-ফুফু একত্রে বসবাস করে তাকে যৌথ পরিবার বলে। বাংলাদেশ ও ভারতের গ্রামাঞ্চলে যৌথ পরিবার দেখা যায়।
গ. উদ্দীপকে সামাজিক সংগঠন পরিবারের ইঙ্গিত রয়েছে। সাধারণত একই সঙ্গে বসবাসকারী কয়েকজন ব্যক্তির সমষ্টিকে পরিবার বলে যা বিয়ে, আত্মীয়তা অথবা পিতা-মাতার সূত্রের বন্ধনে আবদ্ধ একটি সামাজিক প্রতিষ্ঠান। বিবাহ পরিবার গঠনের অন্যতম পূর্বশর্ত। একজন পুরুষ সমাজস্বীকৃত উপায়ে একজন নারীকে বিয়ে করার মাধ্যমে পরিবার গঠন করে। এ পরিবার ব্যবস্থা থেকেই মানবজাতির বিকাশ লাভ ঘটেছে এবং তার সাথে সমাজেও অগ্রগতি সাধিত হয়েছে। আদিম সমাজে পরিবার ব্যবস্থা এমন ছিল না। নানা বিবর্তনের মধ্য দিয়ে পরিবার আধুনিক রূপ লাভ করেছে। উদ্দীপকে দেখা যায়, মিশ্র ও নাহার একে অপরকে ভালোবেসে সমাজ স্বীকৃত পন্থায় নির্দিষ্ট কিছু আনুষ্ঠানিকতার মধ্য দিয়ে অর্থাৎ বিবাহের মধ্য দিয়ে চিরস্থায়ী সামাজিক সংগঠনের সদস্য হয়; যা মূলত পরিবারকেই নির্দেশ করে। তাই বলা যায়, উদ্দীপকে চিরস্থায়ী সামাজিক সংগঠন পরিবারের কথাই ইঙ্গিত করা হয়েছে।
ঘ. উক্ত সংগঠনের অর্থাৎ পরিবারের শিক্ষা বিষয়ক ভূমিকা আগের মতো নেই—উক্তিটি যথার্থ। মূলত শিশুর সামাজিকীকরণে প্রথম ভূমিকা রাখে পরিবার। শিশুর প্রাথমিক শিক্ষা গ্রহণে পরিবারের ভূমিকা গুরুত্বপূর্ণ। প্রকৃতপক্ষে পিতা-মাতার মাধ্যমেই শিশু শিক্ষা জগতে প্রবেশ করে। এ কারণে বলা হয়, পরিবার হলো গুরুত্বপূর্ণ শিক্ষা প্রতিষ্ঠান। যৌথ পরিবারগুলোতে খুব অল্প বয়স থেকেই সন্তান সন্ততিরা পারিবারিক পেশায় সাথে যুক্ত হতো। পরিবার এক্ষেত্রে শিশুর শিক্ষার কেন্দ্র হিসেবে কাজ করত। কিন্তু শিক্ষাক্ষেত্রে পরিবারের এ দায়িত্ব ও ভূমিকা বর্তমানে অন্যান্য প্রতিষ্ঠানগুলো গ্রহণ করেছে। শিশু শিক্ষার জন্য সাধারণ স্কুল, টেকনিক্যাল বিদ্যালয়, কিন্ডার গার্টেন, ইংলিশ মিডিয়াম স্কুলসহ বহু প্রতিষ্ঠান গড়ে উঠেছে। আর এ প্রেক্ষিতে বলা যায় যে, পরিবারের শিক্ষা বিষয়ক ভূমিকা আগের মতো নেই। যা শিশুর সামাজিকীকরণে প্রভাব ফেলছে।

সৃজনশীল—৮ ■ নিচের ছকটি লক্ষ্য করো এবং প্রশ্নগুলোর উত্তর দাও:

ছক-১: ধর্ম শিক্ষা	ছক-২: লালন-পালন	ছক-৩: বিনোদন
ক্যাসেট	বেবি কেয়ার	পার্ক
ভিসিডি	ডে কেয়ার	যাদুঘর
মৌলভী	বেবি হোম	চিড়িয়াখানা

- ক. শিশুর সামাজিকীকরণে প্রথম ভূমিকা রাখে কোনটি?
খ. শিশুর সামাজিকীকরণে পরিবারের প্রভাব বর্ণনা কর।
গ. ছক-১ এ কোন বিষয়টির প্রতিফলন ঘটেছে? ব্যাখ্যা কর।
ঘ. ছক-২ ও ছক-৩ বিশ্লেষণ কর।

৮ নম্বর সৃজনশীল প্রশ্নের উত্তর

- ক. শিশুর সামাজিকীকরণে প্রথম ভূমিকা রাখে পরিবার।
খ. শিশুর জীবনের ভালো ও খারাপ অভ্যাস পরিবারের সামাজিকীকরণের ফল। পরিবারের মধ্যেই শিশুর সামাজিক নীতিবোধ, নাগরিক চেতনা, সহযোগিতা, সম্প্রীতি, ভ্রাতৃত্ববোধ, আত্মত্যাগ ও ভালোবাসা জন্মে। পরিবারে শিশুর সৃষ্ট সামাজিকীকরণ হলে শিশু সমাজের কাজক্ষিত আচরণ করে। তাই একটি শিশুর সামাজিকীকরণে পরিবারের প্রভাব অপরিণীম।
গ. ছক-১ এ শিশুর ধর্ম শিক্ষার বিষয়টির প্রতিফলন ঘটেছে। এক সময় ধর্মশিক্ষা বিষয়ে পরিবার যথেষ্ট ভূমিকা পালন করতো। কিন্তু বর্তমানে এর পরিমাণ অনেকাংশে হ্রাস পেয়েছে। পাশ্চাত্য ও বস্তুবাদী চিন্তাধারা এক্ষেত্রে মূল ভূমিকা রেখেছে। সাধারণত

পরিবারের মধ্যেই শিশুর ধর্মশিক্ষা দেওয়া হয়। ধর্মীয় মূল্যবোধ ও নৈতিকতা সম্পর্কে পিতামাতা, কিংবা দাদা-দাদি বা অন্যান্য সদস্য বিভিন্নভাবে শিশুকে অবহিত করতেন। সময়ের পরিবর্তনে পরিবারের ধর্ম বিষয়ক ভূমিকা দুর্বল হয়ে পড়েছে। যা শিশুর সামাজিকীকরণে প্রভাব ফেলেছে। সাম্প্রতিক সময়ে দেখা যায় ক্যাসেট, ভিসিডি কিংবা মোলভী রেখে শিশুকে ধর্ম শিক্ষা দেওয়া হচ্ছে যা উদ্দীপকের ছক-১ এ দেখানো হয়েছে। এতে শিশুর মধ্যে প্রকৃত ধর্মীয় মূল্যবোধ তৈরি হচ্ছে না। ধর্ম মানুষের জীবনে যে মানবিক, নৈতিক গুণ তৈরি করে, সে গুণ তৈরি হচ্ছে না।

- ঘ. ছক-২ ও ছক-৩ এ শিশুর সামাজিকীকরণের দুটি পরিবর্তনশীল ধারা তুলে ধরা হয়েছে। এতদিন পর্যন্ত শিশুর লালন পালন পরিবারের প্রধান দায়িত্ব হিসেবে বিবেচিত হয়ে এসেছে। কিন্তু বাংলাদেশের সমাজে এখন অনেক প্রতিষ্ঠান সৃষ্টি হয়েছে। যারা শিশুর লালন পালনের দায়িত্ব যত্নসহকারে বহন করে। তবে শহরে এসব প্রতিষ্ঠান বেশি গড়ে উঠেছে। যেমন : চাকুরিজীবী পিতা-মাতার সন্তানরা বেবি হোমে, ডে-কেয়ার সেন্টার কিংবা অন্যভাবে লালন পালন হচ্ছে যা ছক-২ এ দেখানো হয়েছে। আবার দেখা যায়, পরিবারের অনেক দায়িত্ব বিভিন্ন সামাজিক ও রাষ্ট্রীয় প্রতিষ্ঠান গ্রহণ করেছে। শিক্ষা, বিনোদন, অর্থনৈতিক উৎপাদন ইত্যাদি কাজগুলো এখন পারিবারিক পর্যায়ে তেমন সম্পন্ন হচ্ছে না। পার্ক, যাদুঘর ও চিড়িয়াখানার মতো বিনোদনমূলক ব্যবস্থা পরিবার করছে না। এগুলো সামাজিক ও রাষ্ট্রীয়ভাবে তৈরি হচ্ছে যা ছক-৩ এ দেখানো হয়েছে। সুতরাং দেখা যাচ্ছে পারিবারিক মণ্ডল হতে বেরিয়ে বর্তমানে শিশুর সামাজিকীকরণের ক্ষেত্রে ব্যাপক পরিবর্তন এসেছে।

সৃজনশীল—৯ ■ নিচের উদ্দীপকটি পড় এবং প্রশ্নগুলোর উত্তর দাও:

শিশু ও মুন দম্পতির ঘর আলোকিত করে একটি শিশু সন্তান জন্ম নিল। ধীরে ধীরে শিশুটি বেড়ে উঠছে। তার এই বেড়ে উঠার ক্ষেত্রে পরিবারের সদস্য ও পিতামাতার থেকে বিভিন্ন কিছু শিখছে। মূলত শিশুটির এই শিখন প্রক্রিয়াটি তার মৃত্যু পর্যন্ত চলতে থাকবে।

- ক. মানব সমাজের সবচেয়ে গুরুত্বপূর্ণ সামাজিক প্রতিষ্ঠান কী?
খ. পরিবার বলতে কী বোঝায়?
গ. উদ্দীপকে কোন প্রক্রিয়ার প্রতিফলন ঘটেছে? ব্যাখ্যা কর।
ঘ. ‘উক্ত প্রক্রিয়ার সবচেয়ে গুরুত্বপূর্ণ মাধ্যম পরিবার’—মতামত দাও।

৯ নম্বর সৃজনশীল প্রশ্নের উত্তর

- ক. মানব সমাজের সবচেয়ে গুরুত্বপূর্ণ সামাজিক প্রতিষ্ঠান হলো পরিবার।
খ. পরিবার হচ্ছে একই সঙ্গে বসবাসকারী কয়েকজন ব্যক্তির সমষ্টি। বিবাহের মাধ্যমেই এর সূত্রপাত হয়। বস্তুত পরিবার হচ্ছে বিয়ে, আত্মীয়তা অথবা পিতা-মাতার সূত্রের বন্ধনে আবদ্ধ একটি সামাজিক প্রতিষ্ঠান।
গ. উদ্দীপকে সামাজিকীকরণ প্রক্রিয়ার প্রতিফলন ঘটেছে। শিশু যেভাবে সামাজিক হয়ে উঠে তাকে সামাজিকীকরণ বলা হয়। শিশু পরিবারে জন্ম নেয় এবং পরিবারেই বেড়ে ওঠে। শিশুর এই বেড়ে ওঠার ক্ষেত্রে তার পিতামাতার পাশাপাশি পরিবারের সদস্যরা ভূমিকা পালন করে। পিতা-মাতার মাধ্যমেই সে শিক্ষা জগতে প্রবেশ করে। সে পরিবারের সদস্যদের কাছ থেকে সহযোগিতা, সহিষ্ণুতা, সহমর্মিতা, সহনশীলতা, নিরাপত্তাবোধ, সমানভাগের অংশীদার প্রবণতাসহ বিভিন্ন গুণ অর্জন করার শিক্ষা পায়। যা শিশুর সামাজিকীকরণে প্রভাব ফেলে। শিশুর এই শিখন প্রক্রিয়া জন্ম থেকে মৃত্যু পর্যন্ত চলতে থাকে; যা উদ্দীপকে বলা হয়েছে। সুতরাং বলা যায় যে, উদ্দীপকে সামাজিকীকরণ প্রক্রিয়াই নির্দেশিত হয়েছে।
ঘ. উক্ত প্রক্রিয়ার অর্থাৎ সামাজিকীকরণের সবচেয়ে গুরুত্বপূর্ণ মাধ্যম হচ্ছে পরিবার। মূলত পরিবারের মাধ্যমেই শিশুর প্রথম সামাজিকীকরণ শুরু হয়। এটি শিশু বেড়ে ওঠার প্রথম সূতিকাগার। পরিবার থেকে সে ভাষা শিক্ষা, খাদ্যাভ্যাস, আচরণের শিক্ষা পায়। পরিবার থেকেই শিশু স্নেহ, মায়া-মমতা, ভালোবাসা এবং আবেগীয় সম্পর্কের ধারণা পেয়ে থাকে। পরিবার মাধ্যমেই সে প্রথমে শিক্ষা জগতে প্রবেশ করে। তার খাদ্যাভ্যাস, বর্ণশিক্ষা, ছড়া শিক্ষা, পরিবার থেকেই শুরু হয়। পরিবার মধ্যেই শিশুর সামাজিক নীতিবোধ, নাগরিক চেতনা, সহযোগিতা, সম্প্রতি, ভ্রাতৃত্ববোধ, আত্মত্যাগ ও ভালোবাসা জন্মে; যা শিশুকে সমাজ এ রাষ্ট্রের একজন যোগ্য নাগরিক হিসাবে গড়ে তুলতে সহায়তা করে। আর এ প্রেক্ষিতে আমি মনে করি সামাজিকীকরণের সবচেয়ে গুরুত্বপূর্ণ মাধ্যম হচ্ছে পরিবার।

সৃজনশীল—১০ ■ নিচের উদ্দীপকটি পড় এবং প্রশ্নগুলোর উত্তর দাও:

যৌথ পরিবারের সদস্য রায়হান ও এলমুন উচ্চ শিক্ষিত দম্পতি। তাদের একটি মাত্র সন্তান হাসান। দুজনই চাকুরিজীবী হলেও তারা হাসানের ব্যাপারে খুবই যত্নশীল। হাসানের যেকোনো সমস্যার সমাধানে তারা দুজনই ভূমিকা পালন করে। হাসানও তার বাবা মায়ের প্রতি যথেষ্ট শ্রদ্ধাশীল। বাবা-মায়ের অমতে সে কোন কাজ করে না।

- ক. শিশুর সামাজিকীকরণে কীরূপ পরিবেশ প্রয়োজন?
খ. কোন ধরনের পরিবারে শিশুর সঠিক সামাজিকীকরণ হয় না? ব্যাখ্যা কর।

- গ. হাসানের সামাজিকীকরণে রায়হান ও এলমুনের মধ্যে কার ভূমিকা সবচেয়ে বেশি? ব্যাখ্যা কর।
ঘ. হাসানের সামাজিকীকরণে পরিবারের সদস্যদের পারস্পরিক ভূমিকা মূল্যায়ন কর।

১০ নম্বর সৃজনশীল প্রশ্নের উত্তর

- ক. শিশুর সামাজিকীকরণে সুন্দর পারিবারিক পরিবেশ প্রয়োজন।
খ. শিশুর সামাজিকীকরণের জন্য সুন্দর পারিবারিক পরিবেশ প্রয়োজন। যেসব পরিবারে সাধারণত পারিবারিক বিশৃঙ্খলা, পিতা-মাতার বিচ্ছেদ, ছাড়াছাড়ি, ভিন্ন গৃহে বসবাস, পিতা কিংবা মাতা বা পিতা-মাতা উভয়ের মৃত্যু শিশুর সামাজিকীকরণে বাধার সৃষ্টি করে। এসব পরিবারে শিশুর সুষ্ঠু সামাজিকীকরণ হয় না।
গ. হাসানের সামাজিকীকরণে রায়হান ও এলমুনের মধ্যে এলমুনের ভূমিকাই সবচেয়ে বেশি। কেননা শিশুর পিতামাতার মধ্যে অধিকতর কাছের মানুষ হলেন তার মা। আর শিশুর সামাজিকীকরণের প্রথম সূত্রপাত ঘটে তার মায়ের কাছ থেকে। শিশুর ভাষা শিক্ষার প্রথম মাধ্যম ‘মা’। মা শিশুর যেসব খাদ্যের প্রতি ঝোঁক সৃষ্টি করবেন, শিশুর খাদ্যাভ্যাস ও আচরণে তার প্রভাব লক্ষ করা যায়। মাই প্রথম শিশুকে ঘুম পাড়ায়। পরবর্তী সময়ে শিশু বর্ণশিক্ষা, শব্দ শিক্ষা, ছড়া শিক্ষা মা’ই প্রথম দিয়ে থাকেন। মা-ই প্রথম শিশুকে পারিবারিক ও সামাজিক নিয়ম-শৃঙ্খলা ও নীতিবোধের শিক্ষা দেয়। এসবই শিশু মনে প্রভাব ফেলে। যা তার আচার-আচরণের মধ্য দিয়ে প্রকাশ পায়। আর এ কারণেই আমি মনে করি, রায়হান ও এলমুনে মধ্যে হাসানের সামাজিকীকরণে এলমুনের ভূমিকাই বেশি।
ঘ. হাসানের সামাজিকীকরণে পরিবারের অন্যান্য সদস্যদের ভূমিকা অত্যন্ত তাৎপর্যপূর্ণ। বস্তুত বাবা পরিবারে জন্য উপার্জন করেন, কোনো কোনো পরিবারে মাও উপার্জন করেন। সংসার পরিচালনার জন্য তাদেরকে অনেক নিয়ম-নীতি ও শৃঙ্খলা প্রয়োগ করতে হয়। পিতা-মাতার এই স্বতন্ত্র আচরণ, মূলবোধ শিশুর সামাজিকীকরণকে প্রভাবিত করে। একটি শিশু পরিবারের বড় ভাই ও বোনদের কাছ থেকে সহযোগিতা, সহমর্মিতা, শৃঙ্খলাবোধ, নিয়মনীতি, স্নেহ-ভালোবাসা প্রভৃতির শিক্ষা পেয়ে থাকে। যা পরবর্তী সময়ে শিশুর আচরণে প্রভাব ফেলে। দাদা-দাদি, নানা-নানি, চাচা-চাচি, চাচাতো ভাই ও বোন এবং নিকট আত্মীয়স্বজনের কাছ থেকে অনেক বিষয় শিশুর আচরণে রেখাপাত করে। এটি শিশুর ধারণাকে সমৃদ্ধ ও নিজ সম্পর্কে সুদৃঢ় করে। আর এ প্রেক্ষিতে বলা যায় যে, হাসানের সামাজিকীকরণে পরিবারের অন্যান্য সদস্যদের ভূমিকা গুরুত্বপূর্ণ।

■ ■ ■ নিজে চেষ্টা করো ■ ■ ■

সৃজনশীল—১১ ■ নিচের উদ্দীপকটি পড় এবং প্রশ্নগুলোর উত্তর দাও:

মীরা একটি বেসরকারি অফিসে উচ্চপদে চাকরি করে। মীরার অফিসের সাপোর্ট স্টাফ যখন মীরাকে সকালে চা দেয় তখন সে তাকে ধন্যবাদ জানায়। সাপোর্ট স্টাফকে ধন্যবাদ দেওয়াতে তার কলিগরা অবাক হয় এবং এ ব্যাপারে জিজ্ঞেস করে। মীরা বলে যখন ছোট ছিলাম তখন কাজের ছেলেটি যখন নাস্তা দিত, চা দিত তখন মা বলতেন, তাকে ধন্যবাদ দাও। সে তোমার কাজটি করে দিয়েছে। মা আরও বলতেন, মানুষকে তার কাজের জন্যে কখনও ছোট করে দেখো না; বরং তাকে মানুষ হিসেবে মূল্যায়ন করো।

- ক. শিশুর সামাজিকীকরণের আনুষ্ঠানিক মাধ্যম কোনটি?
খ. ব্যক্তির সামাজিকীকরণে পরিবার কীরূপ ভূমিকা পালন করে?
গ. মীরার সামাজিকীকরণে কোন প্রতিষ্ঠানটি মুখ্য ভূমিকা পালন করেছে? ব্যাখ্যা কর।
ঘ. তুমি কি মনে করো, শহরের সংস্কৃতি মীরার এই মূল্যবোধ সৃষ্টিতে ভূমিকা রেখেছে? উত্তরের সপক্ষে যুক্তি দাও।

সৃজনশীল—১২ ■ নিচের উদ্দীপকটি পড় এবং প্রশ্নগুলোর উত্তর দাও:

রাকিব ৯ম শ্রেণির ছাত্র। তার বাবা-মা দুজনেই চাকরি করে। কিন্তু তারা বাসায় এলেই ঝগড়া বিবাদে লিপ্ত থাকে। এতে রাকিবের কষ্ট হয় এবং দুষ্ট প্রকৃতির প্রতিবেশী বন্ধুদের সাথে মেলামেশা করে। পিতামাতা বিষয়টি গুরুত্ব না দেওয়ায় তার মধ্যে নানা রকম নেতিবাচক আচরণ লক্ষ করা যায়।

- ক. শিশুর সামাজিকীকরণে শক্তিশালী ভূমিকা পালন করে কে?
খ. শিশুর সামাজিকীকরণের মাধ্যম হিসেবে পরিবারের ভূমিকা ব্যাখ্যা কর।
গ. রাকিবের ব্যক্তিত্ব গঠনে তার বন্ধুদের প্রভাব ব্যাখ্যা কর।
ঘ. ‘শিশুর সুষ্ঠু ব্যক্তিত্ব গঠনে পিতামাতার ভূমিকা গুরুত্বপূর্ণ’—উপরের ঘটনার আলোকে বিশ্লেষণ কর।